

## DESKOBRE LALEHAN IHA Ó-NIA LARAN

Tinan ida ne'e mak tinan ikus atu prepara an ba bisentenariu Dom Bosco nian. Reitor Mor konvida ita atu hateke ba Dom Bosco nu'udar modelu espiritualidade nian no atu la'o iha dalan santidade ne'ebé nia hatudu, tuir ida-idak nia vokasaun.

Tan ne'e, tinan 2014, oratóriu sira hili nu'udar sira nia motu: "Deskobre Lalehan iha ó-nia laran" atu fó hanoin mai ita katak, ema hotu tenke tau matan ba sira-nia klamar no halo buat hotu tuir inspirasaun konxiénsia nian. Ita-nia objetivu, ba tinan ida ne'e, mak: haburas oratorianu sira nia amizade ho Maromak hodi habelar ba kolega sira; katak la to'o atu ida-idak hanoin ba ninia klamar, maibé, tuir Dom Bosco nia ain-fatin, oratorianu ida-idak sei sai "misionáriu" atu lori kolega barak hatene no hadomi Jezús.

Ita-nia logu reprezenta Dom Bosco ne'ebé la'o iha tali leten, katak nia prontu atu halo buat hotu ne'ebé bele soi labarik no foin-sa'e ida-idak nia klamar. Ita haree katak nia dada tun pajina hodi hatudu lalehan, atu dehan katak iha ema ida-idak "horik" klamar ida. Fatuk murak rua suporta tali iha ne'ebé Joazinho la'o, hodi fó hanoin ba virtude sira no espiritualidade ne'ebé tenke gia ita-nia hahalok. Iha kotuk ita bele haree panorama Timor nian, iha ne'ebé ita moris ba, tanba iha ne'e ita-nia espíritu salezianu sei hola "forma" konkreta.



Reitor Mor husu ba Família Saleziana atu hakle'an mehi fatuk murak 10 (diamante 10) ne'ebé Dom Bosco apresenta ba Konsellu salezianu sira nian no Beatu Felipe Rinaldi hateten katak "hatudu modelu salezianu loos nian". Tan ne'e, ba tempu ida-idak ita sei hakla'en "fatuk murak" 1 (virtude ida) liuhusi katekeze no atividade oinoin. Atu bele hatene didi'ak mehi ida ne'e, bele hetan ninia PPT no ninia testu iha website.

Hanesan bain-bain ita sei fahe ita-nia tinan pastorál ba tempu sira:

- Fulan salezianu
- Tempu bainbain (fevereiru no semana dahuluk marsu nian)
- Kuarezma
- Tempu paskál no marianu
- Tempu bain-bain (1: junu-jullu; 2: agostu-setembru)
- Fulan misionariu (outubru no novembru)
- Adventu no Natál

Ba tempu ida-idak imi sei hetan katekeze ba labarik, adolexente no foin-sa'e sira no lectio ba adolexente sira; no mós proposta sira kona-ba atividade ruma, jogu, istória ida, akontesimentu ida husi santu salesianu nia moris, proposta filme badak ida (boneka) nian kona-ba santu ida ba labarik sira no orasaun (selebrasaun penitensiál) ida.

Hafoin, conforme tempu forte ka buat espesiál ruma ne'ebé sei mosu, ita sei adata ita-nia programa ida ne'e.

Ita reza ba malu atu tinan ida ne'e, hodi tuir Dom Bosco nia ain-fatin, ita bele halo esperiénsia espírituál forte, hamutuk ho oratorianu sira, kona-ba Maromak nia prezensa iha ita leet